

# FPP BizNewz

June - November 2022

MANAGEMENT • INVESTMENT • ECONOMICS • ENTREPRENEURSHIP • TECHNOLOGY

## Endometriosis

Sejauh Mana Kesedaran Anda?

## Personal Shopper

What You Need To Know

## Sustainable Packaging in eCommerce

A Few Solutions to Protect the Planet

Type text here

## How To Teach Your Children To Pack Their Backpacks For Travel? An Easy Guide

## A Short Vacay in Hat Yai

## My Sister, My Best Friend

## Kredit Mikro di Malaysia

# H0BI



Publication Date  
8 November 2022

Photo by Matt Chambers on Unsplash



# NUKILAN LAGU BUAT PUTERIKU



Suhaily Maizan Abdul Manaf  
Fakulti Pengurusan dan Perniagaan, UiTM Cawangan Terengganu

Emel: suhailymaizan@uitm.edu.my

Sebuah lagu berjudul Kemarin dendangan kumpulan Seventeen dari negara seberang ternyata amat menyentuh hati. Bait lirik dan melodinya seakan-akan tepat melafazkan apa yang cuba disorokkan dari pandangan umum. Lagu ini hadir saat diri ini kehilangan sebelah hati dan separuh jasad yang turut dibawa pergi bersama permata hati yang sangat dinanti kehadirannya. Ia seakan sebuah ekspresi nukilan sendiri namun ada insan yang mampu membaca dan menterjemahkan ke dalam sebuah lagu yang menjelmakan sebuah kenangan yang tidak akan dilupakan hingga ke syurga Firdausi.

Lirik:

Kemarin engkau masih ada di sini  
Bersamaku menikmati rasa ini  
Berharap semua takkan pernah berakhir  
Bersamamu  
Bersamamu

Coretan:

Ke mana sahaja membawa seorang insan yang sihat selama 9 bulan 10 hari, suka duka

bersama di dalam rahim, menunggu hari untuk melihat ke dunia. Insan itu jugalah pembakar semangat si ibu dalam mengharungi perjuangan pengajian doktor falsafah, menemani si ibu tak kira masa. Mana mungkin si ibu akan berfikir di luar kotak yang semua impian akan musnah sekelip mata, semuanya dengan kuasaNya.

Lirik:

Kemarin dunia terlihat sangat indah  
Dan denganmu merasakan ini semua  
Melewati hitam-putih hidup ini  
Bersamamu  
Bersamamu

Coretan:

Tidak pernah terdetik di hati si ibu yang zuriat yang cukup sempurna sifatnya dan hanya menunggu masa untuk dilahirkan akan pergi begitu sahaja tanpa sebarang pesan. Tidak pernah sesekali si ibu mengimpikan untuk memiliki anak syurga. Impian si ibu adalah sama seperti impian semua ibu bapa di luar sana, inginkan zuriat yang dikandung selama 9 bulan 10 hari akan dilahirkan selamat sempurna serta membesar menjadi insan berguna. Si ibu menjadikan zuriat tersebut sebagai penguat semangat dalam mengharungi pengajian tertinggi dalam hidupnya serta mengimpikan akan berpotret bersama-sama di hari bersejarah nanti. Tidak pernah terlintas yang buruk-buruk, semuanya indah-indah sahaja.

Lirik:

Kini sendiri di sini  
Mencarimu tak tahu di mana  
S'moga tenang kau di sana  
Selamanya

Coretan:

Namun, di satu petang yang hening, naluri si ibu terdetik sesuatu yang sukar untuk diungkapkan. Masih terngiang-ngiang lagi gerakan lemah terakhir si comel di dalam kantungnya. Dan seperti batu besar menghempap kepala dan seperti api membakar diri saat doktor mengesahkan si comel yang sentiasa aktif itu telah meninggal dunia. Anak ibu telah tiada! Saat kehujanan yang mengiringi keberangkatan si ibu ke hospital seakan-akan meratapi kehilangan zuriat ini serta merentap seluruh hidup si ibu yang telah kosong fikirannya dengan sekelip mata. Si ibu buntu. Si ibu puas berfikir apa hikmah yang Allah sedang tunjukkan. Tidak tahu adakah ini mimpi atau realiti. Kenapa Allah pilih si comel ibu di saat menunggu masa untuk melihat dunia? Anak ibu telah kembali kepada PenciptaNya sekelip mata. Allahuakbar!

Lirik:

Aku s'lalu mengingatmu  
Doakanmu setiap malamku  
S'moga tenang kau di sana  
Selamanya

Coretan:

Tidak mudah menjalani kehidupan berpantang tanpa anak disisi. Seluruh hidup seakan musnah walau hati telah reda menerima hikmahNya. Fizikal dan emosi bercampur-baur mencari arah tuju. Memujuk hati agar menerima ujian ini yang mana tidak seperti ujian insan lain. Itulah kekuatan yang mampu menepis segala air mata di hadapan khalayak ramai. Namun berjujukan air mata tidak mampu dibendung saat merindukan si anak yang telah berlari-larian di syurga. Si ibu bukan sahaja menyerahkan kembali hakNya, bahkan tidak mampu meneruskan perjuangan pengajian, membiarkan kedua-dua impian ini berlalu pergi dibawa kenangan.

Kini setelah dua tahun berlalu pergi, si ibu tidak pernah sekelumit melupakan setiap kenangan manis bersama si comel. Dialah penghibur hati menemani ibu sepanjang masa, menjadi saksi susah senang si ibu mencapai impian walaupun akhirnya impian itu turut dibawa angin lalu.

Nama diberi bermaksud kekuatan dan kemuliaan kami. Cukup 9 bulan 10 hari dilahirkan tanpa bernyawa. Air mata ditepis, hati merintih. Selamat dikebumikan tanpa talkin, di perkuburan yang menjadi laluan seharian agar mudah dikunjungi. Semangatmu lebih kuat berdepan dengan kehendak Allah untuk kembali ke sisiNya.

Betapa mulia pengorbananmu sayang. Meninggalkan kami dengan kenangan indah yang tidak mampu difahami oleh orang lain. Doakan ibu berjaya dalam perjuangan mengejar cita-cita buat kali kedua. Kekuatan ibu datang dari doa anakku. Kehadiran dan kehilanganmu adalah kekuatan untuk ibu. Itulah hikmah Allah yang sukar ditafsirkan.

Terima kasih Allah kerana memilih diri ini mengharungi ujian sekecil ini.

Azra Syarfina binti Mohd Talmizie

29 Januari 2020 (Denyutan jantung pertama)

8 Oktober 2020 (Disahkan meninggal dunia)

9 Oktober 2020 (Jasad dilahirkan ke dunia, roh sudah berada di syurga)

Al-Fatihah.



BizNewz 2022  
Faculty of Business and Management  
Universiti Teknologi MARA Cawangan Terengganu, Kampus Dungun  
Sura Hujung, 23000 Dungun, Terengganu, MALAYSIA  
Tel: +609-8400400  
Fax: +609-8403777  
Email: biznewzuitm@gmail.com